



საქართველოს მეცნიერებათა ეროვნული აკადემია

ქართული ენციკლოპედიის ი. აბაშიძის სახელობის მთავარი სამეცნიერო რედაქცია

ბაგრატიონი პეტრე ივანეს ძე

ბაგრატიონი პეტრე ივანეს ძე [1765, ყიზლარი, ახლანდ. დაღესტანი, – 12 (24). IX. 1812, სოფ. სიმი, ახლანდ. ვლადიმირის ოლქი], რუსეთის არმიის ინფანტერიის გენერალი (1809), რუსეთის 1812 სამამულო ომის გმირი.

ვახტანგ VI-ის ძმის, იესეს, შვილიშვილის შვილი. მისი პაპა, ალექსანდრე, ყიზლარში დასახლდა 1759, მამა ივანე რუს. არმიის პოლკოვნიკი იყო. 17 წლის ბ-მა სამხ. სამსახური დაიწყო კავკ. მუშკეტერთა პოლკის სერჟანტად. მონაწილეობდა კავკ. მთიელთა წინააღმდეგ ბრძოლებში. 1787-91 რუს.-ოსმ. ომის დროს თავი გამოიჩინა ოჩაკოვის სიმაგრის აღებაში (1788). 1793-94 მონაწილეობდა პოლ. კამპანიაში. 1798 პოლკოვნიკი გახდა და უსტიუგის ეგერთა პოლკის მეთაურად დაინიშნა (შემდგომში ამ პოლკს მისი სახელი ეწოდა). 1799 თავისი პოლკით (უკვე გენ.-მ) მონაწილეობდა ა. სუვოროვის ლაშქრობებში იტალიასა და შვეიცარიაში. მეთაურობდა ავანგარდს და ყველა დიდ ბრძოლაში გამოიჩინა თავი.

საფრანგეთთან 1805-07 ომში სოფ. შენგრაბენტთან (1805 ოქტ.) მან 6-ათასიანი რაზმით შეაჩერა ფრანგთა 30-ათასიანი 2 კორპუსი და რუს. ჯარები ალყაში მოქცევას გადაარჩინა. ამ ბრძოლისათვის გენ.-ლეიტენანტის (1805) წოდება მიიღო. ბ-მა თავი გამოიჩინა აგრეთვე აუსტერლიცის, პროსიშ-აილაუსა და ფრიდლანდის ბრძოლებში.

1808-09 მონაწილეობდა შვედეთთან ომში, სარდლობდა 21-ე დივიზიას (1809 გაზაფხულზე დაიკავა ალანდის კ-ები). 1809-10 მარტამდე სარდლობდა მოლდ. არმიას რუს.-ოსმ. ომში (1806-12). 1811 აგვ-იდან სარდლობდა პოდოლსკის არმიას, 1812 მარტიდან – II დას. არმიას. 1812 ომის დაწყებისას ბ-მა ოსტატური მანევრით, ბრძოლებით უკან დაიხია,

ნაპოლეონის ჭარბი ძალების დარტყმებს აერიდა და უვნებლად მიიყვანა არმია სმოლენსკში, სადაც I დას. არმიას შეუერთდა.

ბოროდინოს ბრძოლაში (1812) იგი სარდლობდა რუს. არმიის მარცხ. ფრთას, რ-ის წინააღმდეგ იყო მიმართული ფრანგების მთავარი დარტყმა. მოიგერია მტრის 7 იერიში, გამოიჩინა განსაკუთრებული სიმტკიცე და სიმამაცე, მაგრამ მძიმედ დაიჭრა და ბრძოლას გამოეთიშა. გარდაიცვალა სოფ. სიმში, დაკრძალეს იქვე, 1839 კი ბოროდინოს ველზე გადაასვენეს.

ლიტ.: ლ ო მ ო უ რ ი თ., პეტრე ბაგრატიონი, თბ., 1946; ნ ა კ ა შ ი ძ ე ნ., ბოროდინოს გმირი, თბ., 1961; Багратион в Дунайских княжествах. Сб., документов, Киш., 1949; Генерал Багратион. Сб., документов и материалов, Л., 1945; Р о с т у н о в И. И., П. И. Багратион, М., 1947.

ბ. ნაკაშიძე
